

**Conzert d'Advënt cun le cor dles ëles Kèrygma** y la Familia Waldauf da Schwaz, cun tesé de meditaziun de Annamaria Fiung en domènia ai 06.12.2015 dales 17:00 tla dlija de Badia. Düc é dër bel inviá da gní.

**Conzert de Advënt:** „ *abracé MOZART* „ Missa solemnis KV 337 cun cianties ladines y internaziunales d'advënt cun l'cor cantus juvenis & orchestra sot ala direziun de André Comploi en sabeda ai 05.12.2015 dales 20:00 te dlija d'Al Plan.

**Conzert d'Advënt** dla Musiga da La Ila adüm al Cor de Dlija, ai 29.11.2015 dales 17.00 te dlija da La Ila. Düc é dër bel inviá.

**Iniziatives di jogh de Badia:** ai vënn indò gherlandes d'Advënt en chësta domènia do les mësses dan stüa di paurs. Por **San Micurá** éle da se prenoté pro David al nr. 347/3420745 (dales 12.00 ales 15.00 y dales 19.00 inant). Chësc ann pól ester che San Micurá vais a tlocuré pro vigni porta de ciasa, mo an pó ince dí de no.


**„Lichterherz/Cuore di luci“**- *Gedenkfeier für Kinder, die vor der Geburt oder kurz nach der Geburt verstorben sind* - en domènia, ai 06.12.2015 dales 16:30 te cortina da Balsan.

**Marcé da Nadé tl Salf Laur Protezioné da Pidrô:** düc é inviá a chësc pice marcé chësta domènia, ai 29.11.2015 dales 10:00 ales 17:00.

**Desvalis sorvisc a Oies:** Padre Ian da Oies chir jënt che fajess sorvisc desvalis: lí les letöres/ supliches, chirí y intoné cianties da Mëssa, partí fora la S.Comuniun, sorvisc da mone, arjigné ca ores de oraziun o adoraziun da sëra. Chi che foss disponibli a fá val'iade val'pice sorvisc (y ince chi che l'fej bel'al momënt), é peria da gní en **sabeda, 05.12.2015 do la S. Mëssa** sön stüa dl sant. Chi che ne pó nia ester presënc en chël de, é peria de telefoné a P. Ian ( 0471/ 839635). Dër bel giulan.

**Marcé da Nadé de benefiziënza:** la scolina da S. Ciascian mët a jí dan Nadé n marcé de benefiziënza por daidé na familia da Weidental che é tl dolur por la mort dl pere jonn y é en dificolté finanziara. Al vëgn ince inviá da porté patüc fat a man te scolina dales 12:30 ales 14:30 o telefoné al nr. 0471/ 849262. Giulan.

**Impressum:** Ploania Badia, redaziun Cristina Frena  
**Comunicaziuns** cina jöbia sëra a [parrocchiabadia@libero.it](mailto:parrocchiabadia@libero.it) o [frencris@alice.it](mailto:frencris@alice.it)  
**Download plata:** [www.valbadiaOnline.it/comunité/unité/pastorala/ValBadia/ploanies](http://www.valbadiaOnline.it/comunité/unité/pastorala/ValBadia/ploanies)



# Plata dla Ploania Badia

San Iaco - San Linert

Ploan: Siur Iaco Wendelin Willeit  
Colonia Badia: 0471/839571  
E-Mail: [parrocchiabadia@libero.it](mailto:parrocchiabadia@libero.it)  
Radio dla Ploania: 91,10 Mhz

UNITÉ PASTORALA



VAL BADIA

[www.unitepastorala.org](http://www.unitepastorala.org)

Ann C

29.11 - 06.12.2015

1ª domènia de Advënt

n. 01

*Scomënciamënt dl ann liturgich „C“*

## ADVËNT

Dein Kommen  
ist die Hoffnung  
für unsere Welt



**Vangele dla domènia che vëgn - 2ª de Advënt**

Luc. 3,1-6

Al ê le chinejimo ann dl govern dl imparadú Tiberius; Pontius Pilatus ê governadú dla Iudea, Erodes tetrarch dla Galilea, so fre Filipus tetrarch dla Iturea y de raconitis y Lisània tetrarch de Abilène; gragn proi ê Hannas y Caifas. Dailó ti é jüda la cherdada de Dî a Jan, al fi de Zacaria, che viò tl desert.

Y al ê rodé suradöt le raiun incër le lordann y incundà dailó n bato de converjiun por le pardonn di picia. Insciö s'ademplí ci ch'al stá scrit tl liber dles pordiches de Isaia: Na usc scraia tl desert: Arjignedi ca le tru al Signur! Avaliedi fora les strades! Vigni fossé dess gní implí sö y vigni crëp y col dess gní arbassé. Ci che é stort dess gní rodunt, ci che é desvalí dess gní valí. Y dötä la jënt odará la salvëza che vëgn da Dî.


# FUNZIUNS SACRES

## 29.11. 1<sup>a</sup> DOMÈNIA de ADVÈNT / Ann C – Festa di ministranc

10.00 Mëssa por la Comunità

**19.30 RORATE: artejagn y familiars** (sona i Turmbläser)

†ti Tone y Rosina Pitscheider  
vis y †ti Alfarei de Parüs  
por fam. Milio y Carolina Pizzinini



## 30.11. Lünesc – S. André Apostul

**07.30 Les Laudes**

## 01.12. Mertesc – S.ta Natalia

**19.30 RORATE: cor de dljia/chi di confaruns** (cianta cor dljia)

†ta Marianna Vittur - aniversar  
†ta Maria Rungg - aniversar  
†ti Linert, Tarejia, Bernardetta, Marta y Irene Pescoll

## 02.12. Mercui

**07.30 Funziun de Advënt por i scolars**

## 03.12. Jöbia – S.Francësch Xaver

**14.00 RORATE: scolars, seniores y vèdui/es** (cianta i scolars)

†ta Crescenza Valentini - aniversar  
†to Konrad Dapoz / por les animes dl purgatore

## 04.12. Vëndres – S.ta Barbara / Prüm vëndres dl mëis

**19.30 RORATE: Consèi de Cûra** (sona i Turmbläser)


†to don Giancarlo Bertagnolli  
†ti Schanung y Tasser de Sogherdëna  
por fam. Urban y Tecla Irsara en rengraziamënt

## 05.12. Sabeda

16.00 S.Mëssa a Oies

**19.30 RORATE: por duc i benefatars dla Cûra**

†to Paul Ploner / †ti dla Villa Erna  
por fam. Martin y Erna Irsara



## 06.12. 2<sup>a</sup> DOMÈNIA de ADVÈNT / Ann C

10.00 Mëssa por la Comunità

**19.30 RORATE: KVW y familiars** (sona i Turmbläser)

†to Emilio Valentini de Col d'Anvi - aniversar  
†ti Paul y Nane Pizzinini de Crafunara  
vis y †ti de Veneranda Ferdigg

# Dala VITA dla CÛRA

## Rorate y domënies d'Advënt

Advënt – tēmp de preparaziun al Nadé – dess se daidé ti **fá lerch a Chël Bel Dî** te nosta vita, te nosc cör. Porchël se tolunse tēmp da s'incunté cun l'Signur propi tl **Rorate** ( con plö orars) y ince cun tigní la **domènia plö cristiana** – lèdia da tan de cosses comercials (sciöche l'Vësko s'á racomané). Co fossera pa da porvé da **jí a pé a dljia**.

Prëitambel y giulan a les Uniuns y a chi che dèida lí, cianté y soné i Rorate.

N gran lalt a nösc **Ministranc**.

*Siur Degan*

**Advënt:** chësta domènia, ai 29.11.2015 – prüma de Advënt - sonará dales 19:00 les ciampans por invié duc ala oraziun d'Advënt te familia.

**Comuniun ai amará:** en vëndres, ai 04.12.2015 – prüm vëndres dl mëis jará siur Degan a proveder dales 09:30 inant.

**Prüma Comuniun:** en mertesc, ai 01.12.2015 dales 20:15 inviunse duc i geniturs di mituns che vá d'aisciöda ala Prüma Comuniun a na incuntada te scola.

**Consèi de Cûra:** te süa ultima sentada ( 10 de nov. ) á le Cunsèi de Cûra ciamó baié dl' "Edema dla Fede" che é jüda bun y an pënna de fá inant en ater ann ( 16-23 de otober 2016 ). Impresciun á fat ci che l'Vësko á dit dla **domènia** y di **Sacramënc**. Co fossera pa da nia ji a cumpré ite les domënies d'Advënt y da ti dé ai Sacramënc plö importanza al contegnü co al fá la festa mai grana assá.

Al é gnü **confirmé** le **sorvisc** de conduturs dla zelebraziun dla Parora y dé l'inciaria a les persones por la preparaziun ala Prüma Comuniun.

I Cunsèis de Cûra y duc é invíá ala conclujiun dla **Sinoda ai 8 de dezëmber** dales 15:00 tl dom da Porsenú.

Por l'**Ann Sant** él la Val Badia adöm a la Val Gherdëna che vá en pelegrinaj a Porsenú la sabeda ai 23 d'aurí 2016 olach'al vëgn daurí la porta santa ( ai 13/12 ).

Al é gnü aprové la domanda por l'assegnaziun de **grunt dla Cûra** a persones che á la ciasa tl prigo.